
PPA KIER PA GOBIERNO CANCELA DECISION DI MINISTRO TICO CROES PA PRIVATISA A.T.A.

ORANJESTAD(AAN) -- Partido PPA a manda un fax pa gobierno, Parlamento, A.T.A., A.H.A.T.A., K.V.K. caminda nan ta pidi pa cancela e decision irresponsabel di Minister Tico Croes pa privatiza Aruba Tourism Authority (A.T.A.). DIARIO a ricibi copia di e fax cu ta dirigi na Promer Minister Eman cu ta papia pa su mes.

"Conseho di Partido PPA den reunion fecha 9 di Juni 1998 a trata decision di Min-

ister Tico Croes pa tras di lomba di futuro Minister di Asuntonan Economico y Turismo, dr. Lili Beke pa independisa A.T.A.

PPA ta considera e decision den pura tras di lomba di Beke irresponsabel.

Nos industria di turismo ta un interes nacional y un decision pa independisa A.T.A. mester carga decision di un gobierno legitimo, sosteni pa Parlamento y cu sosten amplio despues di un discusion nacional.

Ningun di e condicionnan aki ta un realidad.

PPA ta haya un yamada sincero y serio riba nos gobierno pa cancela e decision tuma pa Minister Tico Croes, pendiente un proceso mas responsabel na unda ta envolve tanto e minister responsabel pa nos turismo y Parlamento y gremionan lo ta mas garantiza.

Ban demonstra na tur cu nos industria turistico realmente ta un interes nacional y mester worde trata como tal".